



## Općinski načelnik

Busovača; 11.10.2018. godine

Predmet:       Odgovor mladim i obrazovanim iz općine Busovača  
                  (onima koji su mi se obratili i potpisali) – dostavljam,

Uvaženi mladi i obrazovani iz općine Busovača, a koji ste mi uputili dopis sa vašim potpisima u kome ste tražili pojašnjenja i neke odgovore vezano za trošenje budžetskih sredstava.

Dostavljam vam ovaj odgovor, ali ne znam tačno na koju adresu jer to niste napisali u vašem aktu, pa će isti biti prosljeđen preko službene web stranice Općine Busovača, a na kojoj sami kažete da ste pronašli informacije na osnovu kojih nam postavljate pitanja.

Pitanja ste postavili direktno meni kao načelniku Općine Busovača, predsjedniku Općinskog vijeća Busovača, gospodinu Josipu Mravku, te bivšoj predsjednici Općinskog vijeća, gospođi Mirjani Plavčić, kao i svim vijećnicima Općinskog vijeća Busovača u 2016. i 2017. godini.

Navodite da je članom 11. a u vezi člana 4. Zakona o slobodi pristupa informacijama u Federaciji BiH predviđeno da vam se dostave tražene informacije, što nije sporno i iste vam dostavljamo.

**Zanimljivo je i to da sve što navodite u vašem dopisu ste našli na zvaničnoj web stranici Općine Busovača, što znači da je budžet kao i sve radnje javne, transparentne i dostupne građanima na uvid.**

**A da je tako potvrđujete i sami navođenjem da ste do informacija došli upravo na ovakav način.**

Jedna od vaših rečenica glasi ovako: „S obzirom da smo više puta čuli od onih koji obnašaju vlast i uživaju u beneficijama iste kako Općina Busovača nema sredstava za najjednostavnije i visoko prioritetne projekte odlučili smo to provjeriti“.

Lijepo vas molim da sjednete, analizirate i kao načelniku Općine Busovača mi dostavite koji su to najjednostavniji i visokoprioritetni projekti, koliko bi koštali i iz kojih budžetskih sredstava bi trebali biti finansirani? Vrlo rado ću udovoljiti vašem zahtjevu za dobrobit svih građana. Međutim, vidjet ćete da to nije tako.

To da uživamo u beneficijama molim vas da mi kažete kojim, osim plate i svega onoga što pripada svim uposlenicima. Da li bi vi slučajno radili a da za to ne primete platu ili neke druge naknade?

Ovaj odgovor vam dostavljam isključivo kao načelnik Općine Busovača, a da li će to učiniti i drugi kojima ste se obratili, ne znam.

**Dragi mladi i obrazovani općine Busovača.**

**Jedna od vaših rečenica u vašem dopisu, a koja je boldirana, glasi ovako: „Građani niukom slučaju ne trebaju strepiti od općinske vlasti, nego upravo suprotno.....“ Ovo smatram u najmanju ruku pretjeranim. Nisam tiranin, i niko ne treba da strepi od mene, ali isto tako se ne bojim nikoga, jer nema razloga za to.** Izuzetno cijenim i uvažavam građane, jer zahvaljujući njihovom povjerenju sjedim na ovom mjestu i obavljam ovaj posao. Da to međusobno povjerenje ne postoji ne bi po treći put bio izabran za načelnika Općine Busovača i to voljom većine građana naše općine. Na posljednjim izborima bila su tri kandidata za načelnika Općine Busovača, a sam sam osvojio preko 50% glasova građana, što znači da građani imaju povjerenja u mene i sigurno na tajnim izborima nisu strepili i dali mi glas nego je to sigurno bilo iz drugih razloga.

A sada da vam konkretno odgovorim na postavljena pitanja.

1. Pitanje koje se odnosi na JU Dom zdravlja Busovača nije u mojoj nadležnosti nego JU Dom zdravlja lično i Općinskog vijeća Busovača, pa očekujem da će vam oni dati odgovor.

2. Što se tiče pitanja na trošenje budžetskih sredstava za 2016. i 2017. godinu ona su skoro ista pa ću vam tako i odgovoriti.

- U kategoriji naknada za rad komisija u 2016. godini planirano je 35.000,00 KM, a potrošeno 44.704,00 KM, a u 2017. godini planirano je 35.000,00 KM, a potrošeno 54.358,00 KM. Vaša pitanja se uglavnom odnose zbog čega je prvobitni plan prekoračen, koliko je održano sjednica stručnih komisija, ko su članovi komisija, šta je na svakoj od tih sjednica raspravljano, koje zaključke i odluke su donesene, koliko su iznosile naknade po svakoj sjednici stručne komisije....itd.?

Odgovor na ova pitanja bi bio preobiman i ne znam kako bi vam dostavio sve relevantne dokaze za navedeno. I sami ste u dopisu naveli da ste do informacija došli na našim stranicama, ali i u samoj Općini, kod uposlenika općinske administracije. Za sve što želite dobit ćete informaciju, a predlažem vam da zakažete termin kod mene lično, da vam to sa pomoćnicima i onima koji su zaduženi za navedene poslove prezentiramo, jer tu nema nikakvih tajni. Na kraju, građani su dali povjerenje općinskim vijećnicima koji donose budžet i na kraju im isti bude prezentiran, ali i usvojen, kao i njegovo izvršenje.

Plan je jedno, a izvršenje drugo. Ima tu komisija koje formira Općinsko vijeće, ali i onih koje formira načelnik Općine po službenoj dužnosti i ukazanoj potrebi. Stručne komisije su one u kojima ne učestvuju samo uposlenici Općine nego i spoljni saradnici. Nikada nije moguće predvidjeti koliko će biti tih komisija, jer se iste formiraju po potrebi. Naprimjer, ako se nešto radi na području općine Busovača gdje treba stručna ocjena od strane komisija (za tehnički prijem i slično), Općinski načelnik formira komisiju i ista se plaća iz sredstava podnosioca zahtjeva. Ako recimo „Elektroprivreda“, Telekom ili bilo koja druga firma izgradi dio vlastite infrastrukture ili objekata, isti ne mogu biti stavljeni u funkciju što neće biti obavljen tehnički pregled, a to rade upravo stručne komisije koje plaćaju investitori. Bio bih presretan kada bi ove cifre bile daleko veće, jer bi to značilo da se nešto radi, a mi planiramo vrlo oprezno jer bi bilo neozbiljno da se gradi manje nego što predviđamo.

- Sredstva za sport su i u 2016. i u 2017. godini potrošena u većem iznosu nego što su planirana, i to u 2016. godini za 5.000,00 KM, a u 2017. godini za 12.000,00 KM. Sredstva su isplaćivana sportskim klubovima a na vlastiti zahtjev istih. Ovo smatram opravdanim jer su potrebe daleko veće od sredstava koja su na raspolaganju. Isto tako, kalendarska i takmičarska godina su relativno duge i uvijek dođe do nepredviđenih situacija u klubovima koje ne bi mogli premostiti a da ne intervenišemo na ovaj način. U izvjesnom smislu i ovo je pomoć mladima jer se mladi bave sportom, a nama je u interesu da im što više pomognemo. Bio bih presretan da smo mogli planirati veća sredstva u budžetu pa da ne dođe do prekoračenja. No, s obzirom na stanje to nije moguće.

- Sredstva za finansiranje udruženja i mjesnih zajednica takođe se planiraju u budžetu. Vi ste postavili set pitanja za ova sredstva, a između ostalog koliko ima registriranih udruženja, koja se finansiraju, kad su osnovana, ko su zakonski predstavnici i osnivači, itd. Sva udruženja su registrovana kod Ministarstva pravosuđa i uprave SBK a u skladu sa zakonom. Ima tu raznih udruženja, od boračkih, ekoloških, sportskih itd. Za sve šta, kome i koliko je dato postoji uredna dokumentacija koju, ukoliko to želite, možemo vam pokazati ali u službenim prostorijama Općine Busovača.

- Sredstva za finansiranje Gradske knjižnice/biblioteke. U 2016. godini planirano je 70.000,00 KM, a potrošeno 79.000,00 KM, a u 2017. godini planirano je 80.000,00 KM, a potrošeno 102.866,00 KM. U 2016. godini sredstva su potrošena uglavnom za tekuće potrebe (grijanje i ostalo), a u 2017. godini pored tekućih potreba i za finansiranje troškova jednog novog uposlenika.

- Izdaci za nabavku zemljišta i poslovnog prostora – u 2016. godini planirano je 0,00 KM a potrošeno 121.973,00 KM. Radi se o kupovini zemljišta u „Mediapan“ Busovača a za potrebe Općine.

Zemljište je kupljeno i dato na upotrebu JKP „Komunalac“ Busovača na kome je u fazi izgradnje reciklažno dvorište kao i opreme i svega ostalog što je potrebno za njegovo normalno funkcionisanje. Zemljište je kupljeno u redovnoj proceduri, što znači da je preduzeće „Mediapan“ d.d. u stečaju raspisalo javni natječaj, Općina Busovača se prijavila i kupila navedeno zemljište. Za sve postoji potrebna dokumentacija. Lično, kao načelnik Općine sam zadovoljan što je došlo do ovoga.

- Sredstva za izgradnju kanalizacione mreže i vodovoda – planirana sredstva u 2016. godini su bila 100.000,00 KM, a potrošena 128.307,00 KM, dok je u 2017. godini plan bio 100.000,00 KM a potrošeno 156.302,00 KM. U najznačajnijem dijelu ova sredstva su obezbijeđena sa viših nivoa vlasti, to jest sa državnog, federalnog i kantonalnog nivoa, a preostali dio sredstava je učešće Općine Busovača i samih građana. Nije moguće tačno planirati navedena sredstva jer nikada ne možemo znati koliko ćemo sredstava za navedene namjene dobiti sa viših nivoa vlasti.

- Sredstva za prirodne i druge nesreće i zaštitu i spašavanje su takođe potrošena u većim iznosima. U 2016. godini planirano je 36.400,00 KM a potrošeno 44.984,00 KM, dok je u 2017. godini planirano 35.000,00 KM a potrošeno 108.407,00 KM. Razlog je što smo uspjeli obezbijediti sredstva za viših nivoa vlasti, pored vlastitih za koja moram reći da su namjenska, te da su tako i trošena.

- Sredstva za finansiranje infrastrukture Busovačka planina. U 2016. godini planirana su sredstva u iznosu 150.000,00 KM, a potrošeno 0,00 KM, dok su u 2017. godini planirana sredstva u iznosu od 100.000,00 KM, a potrošena u iznosu od 117.378,00 KM. U 2016. godini planirali smo sa viših nivoa obezbijediti sredstva da izvedemo neke infrastrukturne radove, a prije svega kanalizacioni sistem, što nismo uspjeli. Isto je skoro u potpunosti realizirano u 2017. godini, sa čim sam vrlo zadovoljan.

- Izdaci za finansiranje infrastrukture Pridolci. U 2016. godini planirana sredstva su u iznosu 50.000,00 KM, a potrošena 0,00 KM. Za 2017. godinu niste postavili pitanje, ali vam mogu reći da je na istom utrošen značajan dio sredstava od kojih je jedan dio obezbijeđen sa viših nivoa vlasti dok je veći dio sredstava prikupljen od samih građana koji na navedenom lokalitetu imaju zemljište i objekte.

- Izdaci za izgradnju reciklažnog dvorišta. U 2016. godini bilo je planirano 30.000,00 KM a potrošeno je 112.002,00 KM. Napravljen je građevinski objekat kao i kupljena oprema. Isto još nije u potpunosti završeno što znači da će na istom biti ulaganja i u narednom periodu.

- Izdaci za regulaciju rijeka. Svake godine se po potrebi radi na regulaciji, a prvenstveno na sprečavanju od eventualnih poplava. Nismo u stanju u potpunosti riješiti navedeni problem ali radimo prema prioritetima.

- Izrada Strategije razvoja. Planirano 10.000,00 KM, a potrošeno 9,238,80 KM. Vaše postavljeno pitanje je: „Možete li nam prezentirati Strategiju čija je vrijednost 9.238,80 KM?“ Pitanje zvuči pomalo neobično i moglo bi se reći cinično. Da, možemo vam je prezentirati, ista je usvojena od strane Općinskog vijeća Busovača a prethodno je provedena sva potrebna procedura što uključuje javne rasprave na kojima su učestvovala i razna udruženja, mjesne zajednice, privredni subjekti, političke partije, sportski klubovi....Pozivam vas da i vi učestvujete i date pozitivan doprinos, ali i da budete informisani. Što se tiče vašeg pitanja da vam je prezentiramo ista se nalazi na našoj web stranici. Kako god ste pronašli podatke za ova pitanja, tako ste mogli pronaći i ovaj strateški dokument.

- Sredstva za nabavku opreme. U 2016. godini planirano je 2.000,00 KM, a potrošeno 67.545,00 KM. Sredstva su utrošena za uobičajene potrebe, ali i izgradnju centralnog grijanja u zgradi Općine Busovača, kao i u drugoj zgradi u kojoj je smještena Služba za geodetske i imovinsko-pravne poslove. Ovo smatram vrlo važnom i „pametnom“ investicijom.

- Izdaci za izgradnju lokalnih puteva. U 2016. godini planirano 140.000,00 KM, a potrošeno 159.212,00 KM, a u 2017. godini planirano 150.000,00 KM, a potrošeno 240.559,00 KM. Sredstva su uglavnom obezbijeđena iz budžeta Općine, ali su u navedenom učestvovali i sami građani.

Drugo vaše pitanje odnosi se na zimsko održavanje lokalnih puteva, a za što je u 2017. godini planirano 90.000,00 KM, a potrošeno 102.266,00 KM.

Nije moguće tačno predvidjeti navedene iznose, a zavisi od jačine i dužine zime, kao i drugih faktora. Uglavnom, plaćanje se vrši po situacijama potpisanim od strane nadležnog organa i u skladu sa propisanim pravilima.

- Pitanje koje se odnosi na povećan broj uposlenika u Uredu kod Općinskog načelnika i predsjednika Općinskog vijeća Busovača - u 2017. godini iznosio je 10 a planirano je 9. Ko je taj deseti? U 2016. godini održani su općinski izbori, tako da je izabran novi predsjednik Općinskog vijeća, a bivši predsjednik (predsjednica Općinskog vijeća) u mandatnom periodu 2012. – 2016. godina u skladu sa zakonom ima pravo na naknadu 12 mjeseci po isteku mandata s obzirom na dužinu njenog radnog staža. Imenovana je navedeno pravo koristila.

### **Poštovani mladi i obrazovani.**

**Mislim da sam odgovorio na suštinu vaših postavljenih pitanja. Ukoliko iz bilo kojih razloga niste zadovoljni odgovorenim ili vam nešto nije jasno, stojim vam na raspolaganju, te u tom smislu ukoliko želite možemo zakazati termin pa da „uz kafu“ vam prezentiram sve što vas zanima.**

Međutim, dopis smatram mladalačkim, jer i ja sam bio mlad i u potpunosti vas razumijem. Jedno su mogućnosti a drugo želje i realne potrebe. Kada sam došao na ovu funkciju naslijedio sam značajan deficit u općinskom budžetu, a što još uvijek pomalo osjećamo. Hvala bogu da je došlo do stabiliziranja budžeta, tako da će u narednom periodu biti moguće izvršiti bolje planiranje istog.

**Trebali ste malo bolje pogledati strukturu budžeta pa bi vidjeli odakle i šta se finansira. Sa zadovoljstvom ističem da sam prilikom odgovaranja na vaša pitanja uvijek bio sretan kada vidim da su sredstva bila potrošena u iznosu većem nego što je planirano. Nedaj bože da je obrnuto.**

Zamolio bih vas da se obratite sportskim klubovima, udruženja i svima drugim, i pitate ih da li su im sredstva bila potrebna, da li su ista tražili, kako i na koji način su ih potrošili, a ja sam ubijeden da je sve to korektno što ne govorim napramaet, već na osnovu njihovih izvještaja koje redovno prezentiraju Općinskom vijeću.

I na kraju, pozivam vas da se aktivno uključite u sve ovo. Organizujte udruženje mladih, pametnih i obrazovanih općine Busovača pa pozitivno utičite na promjene.

Molim vas, kao što sam rekao na samom početku, da mi dostavite listu najjednostavnijih i visokoprioritetnih projekata, te koliko bi isti koštali i iz kojih sredstava bi bili finansirani. U tom smislu dobro analizirajte budžet i dobro pogledajte od koga bi trebalo „uzeti“ dio sredstava da bi se „dalo“ nekom drugom i izgradilo ono što smatrate najjednostavnijim i visoko prioriternim.

Zanimljivo je što niste postavili pitanje za stipendije gdje je takođe premašen iznos, a iste ste dobili i vi, mladi i obrazovani.

**Ovo se isključivo odnosi na vas koji ste potpisali dostavljeni akt jer vas ne vidim da ste aktivni u bilo čemu, za razliku od ogromne većine mladih i obrazovanih općine Busovača koji su vrlo aktivni i kojima sam zahvalan na njihovim aktivnostima, ali i prijedlozima, primjedbama i sugestijama.**

Stojim vam na raspolaganju za sve što je realno i moguće.

S poštovanjem!

OPĆINSKI NAČELNIK

Asim Mekić, dipl.ing.